

Dewan Rakyat lulus Belanjawan 2021

Percubaan blok pembangkang gagalkan rang undang-undang tak berjaya

Oleh Rohaniza Idris dan Luqman Arif Abdul Karim
bhnews@bh.com.my

Kuala Lumpur: Belanjawan 2021 diluluskan di Dewan Rakyat, semalam apabila bacaan kali ketiga Rang Undang-Undang (RUU) Perbekalan 2021 (Belanjawan 2021) diputuskan menerusi undian belah bahagian.

RUU Perbekalan itu diluluskan selepas bacaan kali ketiga oleh Menteri Kewangan, Tengku Datuk Seri Zafrul Tengku Abdul Aziz yang menyaksikan 111 Ahli Parlimen menyokong, 108 menolak dan seorang tidak hadir.

Difahamkan Ahli Parlimen yang tidak hadir adalah Tengku Razaleigh Hamzah (BN-Gua Musang).

Kejayaan meluluskan Belanjawan 2021 itu secara jelas menolak dakwaan bahawa PN akan tumbang semalam, dan Perdana Menteri, Tan Sri Muhyiddin Yassin mungkin kehilangan jawatannya.

Sebelum itu, cubaan ahli Parlimen blok pembangkang untuk menggagalkan rang undang-undang berkenaan ketika selesai penggulungan usul di peringkat jawatankuasa, juga tidak berhasil apabila undi belah bahagian menyaksikan keputusan sama iaitu 111-108, dengan satu Ahli Parlimen tidak hadir.

Detik yang cukup mendebarkan itu bagaimanapun berakhir sebaik keputusan undian diumumkan oleh Yang Dipertua Dewan Rakyat, Datuk Azhar Azizan Harun.

"Maka, usul RUU Perbekalan 2021 ini disetujui," katanya disahut dengan tepukan meja oleh penyokong kerajaan.

Terdahulu, Tengku Zafrul bangun untuk mengemukakan permintaan supaya usul RUU Perbekalan 2021 dibacakan kali ketiga dan diluluskan.

"Bahawa dewan ini, mengikut subseksyen 4 (3) Akta Kumpulan Wang Pembangunan 1966 (Akta 406), membuat ketetapan iaitu suatu jumlah wang tidak lebih daripada RM69 bilion dibelanjakan daripada Kumpulan Wang Pembangunan bagi tahun 2021.

"Dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau 'P' dalam senarai Anggaran Perbelanjaan Persekutuan 2021.

"Yang dibentangkan sebagai Kertas Perintah 26 Tahun 2020, adalah diumumkan di bawah maksud-maksud yang berkenaan ju-

mlah-jumlah yang bersestentangan dengan butiran-butiran itu di ruangan enam dan tujuh senarai berkenaan," katanya.

RUU Perbekalan itu kini akan dibawa ke Dewan Negara untuk dibahas.

Dewan Rakyat mempunyai 222 kerusi, namun kini mempunyai 220 anggota berikutan kematian dua Ahli Parlimen iaitu Gerik, di Perak dan Batu Sapi, di Sabah.

Oleh itu, 111 undi adalah diperlukan untuk majoriti mudah.

Sementara itu, Ahli Parlimen Tapah yang juga Menteri Sumber Manusia, Datuk Seri M Saravanan serta P Prabakaran (PH-Batu Mengundi) dari Galeri Awam kerana masih dalam kuarantin COVID-19 dengan memakai pakaian perlindungan diri (PPE) selepas menjadi kontak rapat kepada kes positif COVID-19.

Sebelum ini, persidangan Dewan Rakyat menjadi tumpuan terutama ketika RUU itu diluluskan di peringkat dasar pada 26 November lalu menerusi undian suara majoriti selepas melalui tempoh 10 hari perbahasan dan penggulungan oleh setiap kementerian.

Ini diikuti pembentangan di peringkat jawatankuasa yang menyaksikan sembilan kementerian berdepan proses undi belah bahagian sebelum diluluskan iaitu Kementerian Kewangan; Kementerian Perusahaan Perladangan dan Komoditi; Kementerian Wilayah Persekutuan; dan Kementerian Perdagangan Antarabangsa dan Industri.

Turut melalui proses undi belah bahagian ialah Jabatan Perdana Menteri; Kementerian Pelancongan, Seni dan Budaya; Kementerian Pengangkutan; Kementerian Perumahan dan Kerajaan Tempatan; serta Kementerian Komunikasi dan Multimedia.

Peruntukan mencecah RM322.5



bilion dicadangkan di bawah belanjawan berkenaan, iaitu jumlah terbesar dalam sejarah negara, bagi membantu kerajaan mendepani pandemik COVID-19 dan impaknya terhadap kehidupan rakyat dan ekonomi negara.

Kelmarin pula, di luar Dewan Rakyat, Majlis Setiausaha Pakatan Harapan (PH) menegaskan, pengumuman dan penggulungan Belanjawan 2021, baru-baru ini dilihat tidak memenuhi apa dimohon dan diharapkan Ahli Parlimen serta tidak menepati harapan rakyat.

Mereka menyatakan akan mengundi belah bahagian pada bacaan kali ketiga, semalam.

Kerajaan juga berhadapan dengan kumpulan Tun Dr Mahathir Mohamad (BEBAS-Langkawi) yang jelas kelmarin menyatakan akan menolak Belanjawan 2021. Kumpulan Dr Mahathir ini termasuklah tiga lagi Ahli Parlimen iaitu Datuk Seri Mukhriz Mahathir (BEBAS-Jerlun), Datuk Amiruddin Hamzah (BEBAS-Kubang Pasu) dan Datuk Dr Shahrudin Md Salleh (BEBAS-Sri Gading).

Malah, kerajaan dilihat kehilangan satu undi sokongan apa-

bila Tengku Razaleigh dalam sidang media bersama Dr Mahathir semalam secara terbuka mengisytiharkan tidak akan mengundi.

Berdasarkan undian belah bahagian bagi sembilan kementerian, Tengku Razaleigh atau Ku Li sering tidak terbahit dalam pengundian atau tidak hadir.

Langkah menukar kerajaan itu difahamkan sepatutnya tercetus semalam, menerusi peralihan sokongan lapan Ahli Parlimen dari UMNO yang juga dikatakan menyebelahi 'kem' Ketua Pembangkang, Datuk Seri Anwar Ibrahim.

Bagaimanapun, percaturan sedemikian sekadar menjadi 'khabar angin' apabila beberapa Ahli Parlimen berkenaan tampil menafikan dakwaan terbabit, malah nasib sama berlaku terhadap akuan bersumpah (SD) yang kononnya dimiliki Presiden PKR itu.

Sekiranya dihitung, sekurang-kurangnya empat percubaan untuk menggugat pentadbiran kerajaan diterajui PN - iaitu tiga kali daripada Anwar yang mengakui mempunyai majoriti sokongan Ahli Parlimen dan terbaharu kelmarin, menerusi pakatan antara Dr Mahathir dan Tengku Razaleigh - yang semuanya gagal diterjemahkan.

Sebelum ini sebaik Belanjawan 2021 diluluskan di peringkat dasar, Anwar mengeluarkan kenyataan bahawa PH sama sekali tidak akan memberi laluan mudah untuk meluluskan RUU di peringkat jawatankuasa, namun perkara itu juga tidak menjadi kenyataan sehinggalah semalam.

Sementara itu, beberapa penganalisis ekonomi menyifatkan kelulusan Belanjawan 2021 di Dewan Rakyat sebagai petanda positif terhadap usaha berterusan kerajaan dalam memulihkan ekonomi negara yang terkesan susulan

pandemik COVID-19.

Ketua Unit Penyelidikan Risiko Ekonomi dan Politik Universiti Utara Malaysia (UUM), Prof Madya Dr Irwan Shah Zainal Abidin, berkata tumpuan selepas ini perlu diberikan kepada fasa pemulihan ekonomi negara.

"Cabaran virus COVID-19 ini bukan salah kerajaan yang ada, jadi kenapa perlu berpolitik dengan menolak Belanjawan ini yang akhirnya boleh menyusahkan rakyat dan mengakibatkan keadaan politik tidak stabil," katanya dihubungi BH.

Berkongsi pendapat dengannya, Ketua Ahli Ekonomi Bank Islam Malaysia Bhd, Dr Mohd Afzani-zam Abdul Rashid, berkata fasa seterusnya selepas Belanjawan 2021 diluluskan ialah memastikan proses pemulihan ekonomi diurus dengan baik.

"Ini juga dapat memberi suntikan positif dari segi sentimen dalam kalangan pengguna dan peniaga serta pelabur berikutan pelaksanaan belanjawan untuk memberi manfaat kepada semua pihak," katanya.

Penganalisis politik dari Universiti Putra Malaysia (UPM), Profesor Madya Dr Mohd Izani Mohd Zain pula berpendapat, Belanjawan 2021 yang lulus dengan kelebihan hanya tiga undi di Dewan Rakyat semalam, menunjukkan kedudukan kerajaan ketika ini sedikit tergugat berikutan tidak mempunyai mandat selesa.

"Memang jelas sokongan kepada kerajaan agak genting. Jadi, perlu ada kompromi dengan pihak pembangkang untuk dapatkan lagi sokongan.

"Kerajaan perlu melibatkan kerjasama pembangkang khususnya dalam perbincangan berkaitan pentadbiran kerajaan PN untuk menjamin sokongan termasuk dengan UMNO," katanya.



Reaksi Ahli Parlimen blok kerajaan selepas Dewan Rakyat meluluskan Rang Undang-Undang Perbekalan (Belanjawan) 2021 bacaan kali ketiga di Bangunan Parlimen, semalam. (Foto ihsan Jabatan Penerangan)